



SAOPĆENJE ZA JAVNOST

Na oslobađajuću presudu za ubistvo u G. Zoviku Tužilaštvo Brčko distrikta izjavilo žalbu

(Brčko, 2.8.2024. godine)

Na nedavno donesenu presudu Osnovnog suda Distrikta, kojom je Mirko Andrić (50)* oslobođen od optužbe za ubistvo Lovre Čerkezovića iz juna prošle godine, Tužilaštvo Brčko distrikta BiH izjavilo je žalbu Apelacionom sudu. Tužilaštvo je u žalbi iznijelo razloge za donošenje drugačije odluke, navodeći da je u postupku dokazalo da je Andrić u neuračunljivom stanju učinio protivpravno djelo ubistva.

Krajem prošle godine ovo tužilaštvo podiglo je optužnicu protiv Andrića zbog sumnje da je 20. juna te godine u Gornjem Zoviku, kod Brčkog, lišio života Lovru Čerkezovića. Pred Osnovnim sudom, Tužilaštvo je optužilo Andrića da je u blizini planinarskog doma Sv. Bernard, u neuračunljivom stanju, nanio žrtvi više teških povreda usljed kojih je preminula. Kako se navodi u optužnici, nakon što su se uz konzumiranje alkoholnih pića družili u kući žrtve, u susjednom Boću, njih dvojica su Lovrinim automobilom došli do Bunarića, a u toku vožnje došlo je do verbalne prepirke i skretanja na šumski put u blizini doma Sv. Bernard. Sumnja se da je, pošto su izašli iz vozila, Andrić uzeo podesan tvrđi predmet i snažno udario Lovru u predjelu donjeg dijela leđa, zbog čega je Lovro pao na zemlju, pa dok je oštećeni ležao na leđima, uhvatio ga rukama za vrat oštetiši mu funkciju disanja. Zatim ga je podigao i bacio na zemlju tako da je žrtva vrhom tjemena glave pala na tlo, pri čemu je došlo do oštećenja moždine, a zatim i do smrti žrtve. Prema optužnici, Andrić je potom tijelo odveo traktorom u šumu udaljenu oko 1 300 m, gdje je pronađeno 24. juna.

Po prijavi događaja, Tužilaštvo je odmah naredilo, te u saradnji s Policijom Brčko distrikta BiH sprovelo istragu, okončavši je 11. decembra podizanjem optužnice kojom je Andrića optužilo da je u neuračunljivom stanju počinio protivpravno djelo ubistva (*iz člana 163 stav 1 Krivičnog zakona Brčko distrikta BiH*). Pošto je potvrdio optužnicu, sud je održao glavni pretres, nakon čega je 21. juna ove godine donio oslobađajuću presudu, ocijenivši da Tužilaštvo nije dokazalo da je optuženi učinio djelo za koje se tereti. Po prijemu pisanog otpavka presude, Tužilaštvo je nakon cjelovite analize presude i njenih razloga donijelo odluku o izjavljivanju žalbe. Žalbom koju je izjavilo Apelacionom sudu, Tužilaštvo je zatražilo izmjenu ili ukidanje prvostepene presude i vraćanje postupka pred Osnovni sud.

Za ubistvo Čerkezovića, Andrić je optužen kao lice u stanju neuračunljivosti, koje u vrijeme izvršenja djela nije moglo shvatiti njegov značaj i upravljati svojim postupcima. Zbog opasnosti da bi mogao ponoviti djelo, njemu je odmah po hapšenju određen pritvor, nakon čega je smješten u medicinsku ustanovu, gdje je boravio do donošenja presude. Kako je oslobođen od optužbe, pritvor mu je ukinut rješenjem suda, po službenoj dužnosti.

*Preduzimanje radnji krivičnog gonjenja prema optuženom ne znači da je ta osoba zaista i počinilac protivpravnog djela.

**GLAVNI TUŽILAC
ZEKERIJA MUJKANović**